



Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut pisortanit ikiorsiissutit pillugit allannguuteqaqqullugit, taamaalilluni namminerisamik illuutillit aammalu inissianik piginneqatigiillutik pigisallit pisinnaatitaaffigilissagaat pisortanit ikiorsiissutinik ikiorneqarsinnaanngortillugit, kræfteqarlutik nappaateqarnertik ilutigalugu katsorsagassanngoraangamik naliginnarmik akissarsionertik unikkallaraangat sulisinnaajunnarnertik pissutigalugu. Nalunaarusiami erseqqissarneqassaaq ajornartorsiut qanoq isikkoqarnerseq aammalu qanoq ikiortarialiunersut taamatut pisinnaatitaaffilissapata. Nalunaarusiaq UKA2021-mi saqqummiunneqassaaq.

(Inatsisartunut ilaasortaq Erik Jensen, Siumut)

Inatsisartunut ilaasortaq Erik Jensen, Siumut siunnersuuteqarpoq Inatsisartut aalajangiiffigisassaani siunnersuuteqarluni, tassanilu saqqummiunneqarpoq inuit kræftimik nappaateqalersimasut pisortanik ikiorsiissutinik ikiorneqarsinnaanngornissaat pillugu. Tamannalu oqaaseqarfigissavarput.

Inuiaqatigiit kalaallit ukiuni makkunani nappaatinik assut ilungersunartunik aqqusaartugaqartarpugut, ilaatigut inuttut nappaammik katsorsarneqarsinnaanngitsunik aqqusaagaqartarluta, tamatsinnut artornartumik kinguneqartartunik. Pingaartumik ilaqtariit pilersuisuminnik nappaammik eqqorneqarsimatillugit, atukkat inuttut ilaqtariinni allanngorujussuuartarput allaat artornaqisunik pilersuisinnaanermikkut eqqorneqartarlutik.

Ajuusaarnarluinnartumik ukiuni makkunani nappaat kræfti aammalu qaratsakkut aanaartoornerit milikartoornerillu innuttaasut akornanni amerlasuutigut naammattoortalerpagut tamatsinnut ilungersunartumik. Aammalu malunnartumik amerliartorlutik tamannalu assut innuttaasunut amerlasuunut eqquisarpoq assut artornartorsiornartumik.

Ukiuni makkunani napparsimasut amerlasuut ilaatigut ilungersunartumik aqqusaagaqartalerput nappaatit ilaatigut napparsimasut eqqorneqaatigisartagaat ajoraluartumik ilaatigut kingusinaartumik paasineqarlutik katsorsarneqarsinnaanngitsut amerlasuut paasineqartarmata.

Kræftimik nappaateqartut, nunatsinni amerlanerpaat nunat avannarliit eqqarsaatigalugit naammattoorneqartarput, ajoraluartumillu aamma nappaammik toqquteqartartut nunatsinni amerlanerpaaajullutik.

Napparsimasut atugaat soorunami atugassarititaasut eqqarsaatigalugit pitsanngorsarnissaat pingaartillugu sulissutigisariaqarparput. Ilaqutaasut aamma kalluarneqartarput inuuniarnikkut ilaatigut annertuumik eqqorneqartarput inuuniarnikkut aningaasaqarnikkullu.

Ilaqarpugut nappaammik eqqorneqarsimasunik aningaasaqarnikkut assut eqqornerlunneqarsimasunik nappaateqarnertik pissutigalugu. Taamaatut nalaataqarsimasut qanoq iliornikkut ikiorsiisinnaanermut tunngasut pitsanngorsarnissaat eqqarsaatigalugit sulisoqarnissaat isumaqatigaarput.

Ilanngullugu aamma eqqaarusupparput Kalaallit peqqissartut illuanni uninngasut ilaquataqarlutik assut ilungersunartumik atugaqartarmata. Inissaarunnerit inigisamik anisitaasarnertit napparsimasoq ingiaqatertik napparsimavinnut nuukkaangata assut artornartorsiulertarput pingaartumik aamma aalajangersimasunik isertitaqanngikkaanni.

Taakkununnga aamma atugassarititaasut pitsanngorsartariaqarput napparsimasut artorsareersut qaavatigut eqqoqqittarpagut ilaquataat inigisaaniit anisillugit, ila taamatut misigisaqarluni artornassaqaq nalunagu ilaquttat nuliaq uigisaq inissaqaratik allamik anisinneqartut pissutsit taamakkua sukkanerpaamik aaqqinniartariaqarput, inuimmi artorsareersut qaavisigut sulii ilungersunartumik atugaqartinneqarsinnaanngillat.

Taamatut oqaaseqarluta Naalakkersuisut allannguutissatut siunnersuutaat taperserparput.

Hans Enoksen